



جَابِرٌ مَّفِي نِكَاحِي قَمَحٌ

قوله تعالى:

فَسَأَلُوا أَهْلَ الذِّكْرِ إِنْ كُنْتُمْ لَا تَعْلَمُونَ

السلام عليكم ورحمة الله وبركاته

**Soalan :**

Assalamualaikum. Saya ingin bertanya . Apakah status perkahwinan seorang perempuan (anak dara) yang menggunakan wali hakim sedangkan wali bukan mujbir (adik beradik) ada tetapi telah disembunyikan oleh perempuan atau keluarga perempuan tersebut? Adakah nikah perempuan tersebut sah? Adakah wali tersebut dikategori sebagai wali ghaib atau wali ditahan yang dibolehkan berpindah perwalian kepada wali hakim?

وعليكم السلام ورحمة الله وبركاته

**Jawapan:**

Alhamdulillah, bersyukur kita ke hadrat Allah SWT, selawat dan salam ke atas Nabi besar junjungan kita Muhammad SAW, keluarga, sahabatnya dan mereka-mereka yang mengikuti segala sunnah Nabi Muhammad SAW sehingga ke hari kiamat. Terima kasih kepada puan di atas soalan yang telah diajukan kepada kami.

**Perkahwinan yang menyembunyikan keberadaan wali dihukumkan sebagai batal, wanita tersebut perlu mendedahkan perkara berkaitan wali sama ada wali masih ada atau wali enggan kerana ia akan dirujuk kepada pihak mahkamah syariah untuk diputuskan.** Wanita tidak diharuskan menikahkan diri sendiri bahkan pihak yang berhak menikahkan dirinya adalah walinya sama ada wali mujbir atau wali bukan mujbir. Bahkan wali yang berhak menikahkan wanita tersebut mesti ikut turutan mana yang lebih hampir hubungannya dengan wanita tersebut. (Kifayat al-Akhyar 1991M, hlm. 360).

Bagi persoalan yang dikemukakan oleh tuan berkaitan wali ghaib atau wali yang ditahan, ianya tidak boleh dikategorikan sebagai wali ghaib kerana masih wujud keberadaan wali mujbir daripada pihak keluarga bakal pengantin perempuan. Berikutan daripada isu ini, tiada bukti yang kukuh seperti kehilangan wali (*mafqud*) atau anggapan kematian daripada mahkamah, wali dipenjara dan seumpamanya. Maka urusan perwalian tidak boleh diberikan kepada wali hakim kecuali jika wali mewakilkan urusan tersebut kepada wali hakim.

Wali hakim atau wali sultan atau penolong pendaftar perkahwinan dan perceraian merupakan jawatan yang bertanggungjawab serta diberikan kuasa untuk menikahkan pasangan pengantin dalam beberapa situasi khas. Wali hakim ialah wali yang ditauliahkan oleh pemerintah untuk menikahkan perempuan yang tiada wali. Sebab-sebab berpindah perwalian nikah daripada wali khas kepada wali hakim ialah:

- i. Apabila tidak ada wali nasab sama sekali.
- ii. Wali nasab berjauhan sebanyak 2 marhalah
- iii. Kehilangan wali terdekat dengan tidak diketahui sama ada masih hidup atau sudah mati selepas hilang dalam masa yang lama atau menyertai peperangan atau terlibat dalam kemalangan di laut atau di utara atau ditawan pihak musuh dan belum diputuskan anggapan kematian oleh hakim.
- iv. Wali terdekat enggan menjadi wali dan telah disabitkan demikian oleh hakim.
- v. Wali terdekat berada dalam ihram atau umrah.

- vi. Wali terdekat sendiri yang akan berkahwin dengan perempuan yang di bawah perwaliannya. (Mohamad Som bin Sujimon, Abdul Basir bin Mohamad, 2006, hlm 37)

Dalam masalah di atas wali hakim tidak boleh menikahkan pasangan jika tidak mendapat kebenaran dari wali nasab iaitu wali mujbir atau wali bukan mujbir jika mereka diketahui masih ada. Pernikahan itu tidak sah sebagaimana sabda Nabi SAW ( Sunan al-Tirmizi, Ibn Majah, Abu Dawud, Al-baihaqi dan Imam Ahmad)

لَا نِكَاحَ إِلَّا بِوَالِيٍّ

Maksudnya: *Tidak berlaku pernikahan tanpa wali.*

**Perkahwinan yang dilakukan tanpa pengetahuan wali mujbir dan keluarga adalah dihukumkan sebagai batal** sebagaimana sabda Nabi SAW:

إِذَا امْرَأَةٌ نَكَحَتْ بِغَيْرِ إِذْنِ مَوْلَاهَا فَانْكَاحُهَا بَاطِلٌ - ثَلَاثَ مَرَّاتٍ - فَإِنْ دَخَلَ بِهَا لَهَا بِمَا  
فَالْمَهْرُ أَصَابَ مِنْهَا, فَإِنْ تُشَاجَرُوا فَالسُّلْطَانُ وَوَلِيُّ مَنْ لَا وَوَلِيٌّ لَهُ.

Maksudnya: "Mana-mana wanita yang dinikahi tanpa keizinan walinya maka pernikahan itu batal-Rasulullah SAW mengulanginya tiga kali- Jika suami menyetubuhinya dia dikehendaki membayar mahar bagi wanita tersebut atas apa yang dialaminya (akibat persetubuhan itu) jika berlaku pertikaian (kenggan wali menikahkan) maka sultan adalah wali bagi orang yang tidak mempunyai wali".

( Sunan Abi Dawud, Kitab Nikah bab wali, No hadis 2083).

Ulangan tiga kali (فَنِكَاحُهَا بَاطِلٌ) oleh Rasulullah itu menunjukkan bahawa pengetahuan dan keizinan wali dalam sesuatu perkahwinan adalah suatu keutamaan sehingga ia dikira batal tanpa wali.

**Makluman:** Jawapan yang diberikan adalah semata-mata sudut pandang hukum fiqh sahaja. Namun penyoal perlu meneliti aspek perundangan Undang-undang Keluarga Islam yang melibatkan keputusan hakim dalam mahkamah. Perkara ini sangat penting kerana keputusan hakim adalah mengikat seperti kaedah;

حَكْمَ الْحَاكِمِ يَرْفَعُ الْخِلَافَ

Maksudnya: "Keputusan hakim(pemerintah) mengangkat khilaf".

## Rujukan

1. Sunan Abi Daud.
2. Mohamad Som bin Sujimon, Abdul Basir bin Mohamad. 2006. Fikah Kekeluargaan, Kuala Lumpur: Pusat Penyelidikan Universiti Islam Antarabangsa Malaysia.
3. Abi Bakr bin Muhammad al-Husaini al-Damsyiqi al-Syafie. 1991M. *Kifayat al-Akhyar Fi Hal Ghayat al-Ikhtisar*. Beirut: Dar al-Khair.
5. Taji Al-Din Abdul Wahab Bin Ali, 1991M. *Ashbah Al-Nazair*, Beirut: Dar al-Kutub.